

## **Memoria da Unidade de Igualdade 2013-2014**

A Unidade de Igualdade consolidou durante o curso 2013-2014 as iniciativas que estaba levando a cabo dende anos anteriores para avanzar na igualdade real de oportunidades entre as mulleres e os homes da comunidade universitaria.

Unha vez aprobado o I Plan de igualdade entre mulleres e homes as labores centráronse na súa implantación e execución das accións recollidas nel.

### **Xornadas de innovación docente e investigación**

O 13 de decembro de 2013 tivo lugar a «III Xornada de Innovación en Xénero. Docencia e Investigación» dirixida a todo o persoal docente e investigador das universidades do Estado Español na que se presentaron 17 comunicacións procedentes de universidades como a de Burgos, a Autónoma de Barcelona ou a Complutense de Madrid. A lección inaugural foi impartida por Mercedes Bengoechea Bartolomé, profesora da Universidade de Alcalá, experta en linguaxe non sexista. Á Xornada asistiron 84 persoas, 66 mulleres e 18 homes, e foi editada unha publicación recollendo as comunicacións co seu correspondente ISBN.

O 12 de xuño de 2014 tivo lugar a «II Xornada Universitaria Galega en Xénero» organizada polas tres universidades galegas e na que participou persoal docente e investigador de todas elas á que asistiron 103 persoas, 83 mulleres e 20 homes. A realización desta segunda edición consolida este foro como lugar de reflexión e intercambio de experiencias en materia de igualdade. A mesa coordinada pola Unidade de Igualdade de Vigo levaba por título «Violencia simbólica, violencia real» .

### **Acto institucional do 8 de marzo**

O día 8 de marzo, «Día Internacional das Mulleres» realizouse o acto institucional da Universidade de Vigo no que o reitor fixo entrega do segundo premio *uviguala* que lle foi concedido ás coordinadoras do extinto Programa de Posgrao Oficial en Estudos en Xénero, Purificación Mayobre Rodríguez e Beatriz Suárez Briones. No mesmo acto a parlamentaria galega Carme Adán Villamarín invitou á reflexión coa súa conferencia «A igualdade ante a crise» e as alumnas Daisy Alcalde Monteagudo e Patricia Agulla Pérez leron un manifesto.

### **Axudas convocadas pola Unidade de Igualdade**

Para o ano académico 2013-2014 a Unidade de Igualdade levou a cabo, a través das súas convocatorias de axudas, as seguintes actividades para impulsar a igualdade de oportunidades entre mulleres e homes na Universidade de Vigo en colaboración con toda a comunidade universitaria:

#### **Primeiro cuadrimestre:**

- Ciclo de cine: «Pensar o cine V: A discriminación de xénero a debate»

- Ciclo de conferencias-obradoiros: « As diferentes manifestacións da violencia de xénero »
- Obradoiro: « A arte ten xénero? Unha reflexión sobre a arte e o xénero »
- Recital-concierto: « Te solté la rienda »

## Segundo cuatrimestre:

- Xornada de formación en xénero « As literatas e o cinema »
- Xornada « A imaxe da muller na publicidade comercial »
- Conferencia de Anne Fogerty: « Construcións de xénero na literatura irlandesa de comezos do século XX: As mulleres na obra de James Joyce *The Dead* »
- Xornada: « A perspectiva de xénero na educación física e na actividade físico-deportiva do século XXI. Reflexións e accións »
- « Obradoiro de formación en violencia de xénero para intérpretes »
- Mesa redonda: « A instrumentalización do corpo das mulleres. O dereito a decidir a interrupción do embarazo »

## **Actividade de sensibilización contra a violencia de xénero**

En torno ao 25 de novembro « Día internacional para a eliminación da violencia contra as mulleres », realizouse na área comercial do Campus de Vigo unha *flash-mob* deseñada e coordinada por Lésbicas Creando na que participaron alumnas, profesoras e persoal de administración e servizos da Universidade de Vigo. A artista Mercedes Peón, interpretou en directo a música que servía de base para a *flash-mob* que foi gravada pola UVigo-TV e difundida na rede.

## **Actividades de visibilización**

A Unidade de Igualdade ten como unha das súas prioridades contribuír á visibilizar as manifestacións artísticas das mulleres e a súa incursión na sociedade da contorna máis próxima. Por iso, patrocinou as seguintes actividades:

- « Alt.procrea en feminino » no Festival de Teatro Alternativo de Vigo que tivo lugar entre o 13 e o 16 de marzo de 2014 en diversos escenarios da cidade de Vigo. As creadoras que participan neste proxecto son Helen Bertels, Nuria Sotelo e Mercé de Rande.
- « Espazo Igualdade » programado dentro do Festival Sinsal Illa de San Simón realizado entre os días 25 e 27 de xullo de 2014.
- Xornadas de Arte e Acción « Chámalle X » que celebraba o seu décimo aniversario e onde tivo especial protagonismo as *performances* levadas a cabo por mulleres. Desenvolveuse nas cidades de Ourense e Pontevedra durante o mes de setembro de 2013.

Un ano máis e coa mesma orientación, levouse a cabo o «III Proxecto de Visibilización das obras artísticas das alumnas da Facultade de Belas Artes de Pontevedra-**ARTISTAS**» que repartiu máis de 50.000 postais de balde entre toda a comunidade universitaria.

A novidade desta edición é que o proxecto conseguiu entrar nos dous centros de arte contemporánea de referencia en Galicia, o Museo de Arte Contemporánea de Vigo ( MARCO) e o Centro de Arte Galega Contemporánea en Santiago (CGAC).

En relación con este proxecto, as postais foron proxectadas sobre a fachada da Casa Galega da Cultura en formato a grande escala o día 8 de marzo.

Así mesmo, a Unidade de Igualdade editou o calendario para o 2014 «Artistas galegas contemporáneas» que se pode descargar dende a súa páxina web.

### **Actividades de formación**

Durante este ano académico a Unidade de Igualdade organizou en colaboración co Servizo de Persoal de Administración e Servizos a segunda edición do curso de «Políticas públicas da igualdade de oportunidades entre homes e mulleres e promoción profesional» de 16 horas de duración e que se desenvolveu nos Campus de Ourense e de Vigo.

### **Colaboración con outras institucións**

Entre o 28 de outubro e o 13 de novembro de 2013, púdose visitar na Casa das Artes de Vigo a exposición « Mulleres baixo sospeita. Memoria e sexualidade ( 1930-1980)» que se organizou en colaboración coa Concellaría de Igualdade.

### **Informes emitidos**

Durante o curso 2013-2014 a Unidade de Igualdade elaborou e difundiu a través da súa páxina web un informe sobre a «Participación feminina nos órganos de goberno dos centros e departamentos da Universidade de Vigo».

### **Recursos para impulsar a perspectiva de xénero**

Na páxina web da Unidade está dispoñible o «Glosario de termos en políticas de igualdade e estudos en xénero» elaborado e editado pola propia Unidade de Igualdade.

Ademais, elaborouse a «Guía de recursos e medidas de apoio á conciliación» que se pode consultar tamén na páxina web da Unidade.

### **Premios**

Convocouse o «II Premio de creación de materiais e recursos docentes con perspectiva de xénero ANTONIA FERRÍN MOREIRAS» que o xurado declarou deserto.

## **Participación en encuentros, xornadas e seminarios**

No ano 2014, a Unidade de Igualdade participou nas seguintes reunións científicas

- «IX Xornadas de Formación, Educación, Xénero e Igualdade» organizadas en Santiago de Compostela os días 20 e 21 de marzo e onde a Universidade de Vigo interviu na mesa «Accións e políticas de igualdade de xénero no contexto da educación superior»
- «VII Encuentro estatal de las Unidades de Igualdad de las universidades públicas españolas» realizado en Valencia os días 5 e 6 de xuño.
- «V Congreso Internacional Investigación y Género» que tivo lugar en Sevilla entre os días 3 e 4 de xullo.